



The Governor

ITANGAZO RIGENEWE ITANGAZAMAKURU

INAMA NGARUKAGIHEMBWE YA KOMITE YA POLITIKI Y'IFARANGA

Banki Nkuru y'u Rwanda yagumishije igipimo cy'inyungu fatizo yayo kuri 4.5%

Inama ngarukagihembwe ya Komite ya Politiki y'Ifaranga, yateranye ku wa 10 Ugushyingo 2021, isuzuma ibyagezweho nyuma y'ingamba zafashwe mu nama yayo iherutse, inasesengura uko ubukungu bwifashe n'uko bwitezwe mu gihe kiri imbere, ku rwego rw'Isi n'imbere mu Gihugu. Komite ya Politiki y'Ifaranga yasanze umuvuduko w'izamuka ry'igipimo cy'ihindagurika ry'ibiciro ku isoko witezwe kuba hejuru gato ya zero mu mwaka wa 2021, mbere yo kuzamuka ukegera igipimo fatizo BNR yihaye cya 5% mu mwaka wa 2022. Komite ya Politiki y'Ifaranga yafashe icyemezo cyo gukomeza politiki yorohereza ishoramari, igumisha igipimo cy'inyungu fatizo ya BNR kuri 4.5%. Iki cyerekezo cya politiki yifaranga kikaba gikwiye mu gushyigikira izahuka ry'ubukungu no gutuma igipimo cy'ihindagurika ry'ibiciro kizamuka kikagera ku gipimo fatizo cya BNR.

Ubukungu bw'Isi n'ubwo mu Karere bukomeje kuzanzamuka

Imbare y'Ikgigega Mpuzamahanga cy'Imari yasohotse mu Ukwakira 2021, yerekana ko ubukungu bw'Isi bwitezwe kuzamukaho 5.9% mu mwaka wa 2021 na 4.9% mu mwaka wa 2022, nyuma yo guhungabana ku kigero cya 3.2% mu mwaka wa 2020. Ubukungu bw'Afurika yo mu nsi y'ubutayu bwa Sahara bwitezwe kuzanzamuka bukiyongeraho 3.7% mu mwaka wa 2021 na 3.8% mu mwaka wa 2022. Iri zamuka ry'ubukungu bw'Isi n'ubwo mu Karere, bizafasha mu kwiyongera k'ubukungu bw'u Rwanda n'ubwo bizagira uruhare mu izamuka ry'ibiciro ku isoko.

Ubukungu bw'u Rwanda bukomeje gusiba icyaho cyatewe na COVID-19.

Ubukungu bw'u Rwanda bukomeje kuzanzamuka nyuma y'icyaho cyatewe n'icyorezo cya COVID-19, ku bw'ingamba zihamye z'imari ya Leta n'iza politiki yifaranga, hamwe n'itangwa ry'urukingo rwa COVID-19 rikomeje. Nyuma yo kwiyongera ku muvuduko wa 20.6% mu gihembwe cya kabiri cy'umwaka wa 2021, biteganyijweko ubukungu bw'Ighugu buzakomeza kuzanzamuka mu gihembwe cya gatatu cy'uyu mwaka, nk'uko bigaragazwa n'igipimo cyihuse BNR yifashisha mu kugenzura icyerekezo cy'ubukungu mu gihe cya vuba, cyazamutseho 10.3% muri iki gihembwe. Muri iki gihe kandi, agaciro k'ibyacurujwe n'urwego rw'inganda n'urwa serivisi kiyongereyeho 18.2%, aho ak'ibya serivisi kiyongereyeho 19.4%, ak'iby'inganda kiyongeraho 15.2%.

Icipimo cy'inyungu amabanki agurizanyaho nticyahindutse cyane n'inguzanyo zihabwa urwego rw'abikorera zikomeje kwiyongera.

Mu gihembwe cya gatatu cy'umwaka wa 2021, BNR yakomeje politiki yo korohereza ishoramari ishyira amafaranga mu rwego rw'amabanki hagamijwe gushyigikira ubudahungabana bw'imari yarwo. Muri urwo rwego, inyungu ku isoko ry'imari y'igihe gito zagumye hafi y'icipimo cy'inyungu fatizo ya BNR, aho icipimo cy'inyungu ku nguzanyo hagati y'amabanki y'ubucuruzi cyagabanutseho iby'ijana birindwi kigera kuri 5.20% mu gihembwe cya gatatu umwaka wa 2021, ugereranyije n'igihe nk'iki cy'umwaka wa 2020.

Ku bijanye n'inyungu ku isoko rusange ry'imari, ugereranyije n'umwaka ushize, icipimo mpuzandengo cy'inyungu amabanki agurizaho abayagana cyagabanutseho iby'ijana cumi na bibiri (12) kigera kuri 16.35%, bitewe n'ubwiyongere bw'inguzanyo zishyurwa ku gihe kirekire zahawe ibigo n'abantu ku giti cyabo ku nyungu zo hasi. Naho ababitsa mu mabanki barungutse, kuko icipimo cy'inyungu ku mafaranga yabikijwe cyazamutseho iby'ijana cumi n'umunani (18) kigera kuri 8.00% mu gihembwe cya gatatu cy'umwaka wa 2021. Bityo, ikinyuranyo hagati y'icipimo cy'inyungu ku nguzanyo n'icy'inyungu ku mafaranga yabikijwe kigabanukaho iby'ijana 30 kigera ku 8.35% mu gihembwe cya gatatu cy'uyu mwaka.

Inguzanyo zahawe urwego rw'abikorera ziyongereyeho 18.6% mu gihembwe cya gatatu cy'uyu mwaka ugereranyije n'ushize, bitewe n'inguzanyo nshya zatanzwe muri icyo gihe.

Icyuho mu buhahirane n'amahanga cyaragabanutse bitewe n'ibijyayo byiyongereye

Mu gihembwe cya gatatu cy'umwaka wa 2021, ubuhahirane n'amahanga bwakomeje kuzanzamuka aho agaciro k'ibicuruzwa u Rwanda rwoherezayo kazamutseho 58.8% n'ah'ik'ibyo rutumizayo kiyongeraho 12.7%. Uyu musaruro mwiza w'ibyoherewa mu mahanga waturutse ahanini ku izahuka rikomeje ry'ibisabwa ku rwego rw'lsi, izamuka ry'ibiciro by'ibicuruzwa fatizo ku isoko mpuzamahanga hamwe n'umusaruro mwiza w'ibikorerwa mu nganda z'imbere mu Gihugu n'uw'ubuhinzi bw'indabo, imbuto n'imboga. Muri urwo rwego, mu mezi icyenda abanza y'umwaka wa 2021, agaciro k'ifaranga ry'u Rwanda ugereranyije n'idolari ry'Amerika kagabanutseho 2.58% mu gihe kari kagabanutseho 3.72% mu mwaka ushize. Mu mwaka wa 2021, nta hindagurika rikabije riteganyijwe ku isoko ry'ivunjisha, kuko uwizigame mu madovizi bwa Banki Nkuru bushobora gufasha Igihugu gutumiza ibintu mu mahanga mu gihe cy'amezi hafi atandatu (5.6).

Icipimo cy'ihindagurika ry'ibiciro ku isoko kizaba hejuru gato ya zero mu mwaka 2021 mbere yo kuzamuka kikegera icipimo fatizo cya BNR cya 5% mu mwaka wa 2022.

Mu gihembwe cya gatatu cy'umwaka wa 2021, icipimo cy'ihindagurika ry'ibiciro ku isoko cyagabanutseho 0.6%, nyuma yo kuzamukaho 0.7% mu gihembwe cya kabiri cy'uyu mwaka. Iri manuka ry'ibiciro ryatewe ahanini n'iry'ibiciro ku bicuruzwa na serivisi by'imbere mu



Gihugu, nk'iby'ibiribwa n'iby'ubwikorezi. Ibiciro by'ibiribwa byagabanutse bitewe n'umusaruro mwiza w'ibihembwe by'ihinga B na C, n'aho ibiciro by'ubwikorezi byari hasi ugereranyije n'umwaka wa 2020, aho ibiciro byo gutwara abantu mu buryo bwa rusange byari hejuru cyane bitewe n'ingamba zafashwe mu gukumira icyorezo cya COVID-19. Biteganyijwe ko igipimo cy'ihindagurika ry'ibiciro ku isoko kizazamukaho 0.7% mu mwaka wa 2021 na 5.4% mu mwaka wa 2022, bitewe n'izamuka ry'ibiciro by'ibituruka mu mahanga hamwe n'iry'ibiciro by'ibicuruzwa fatizo ku isoko mpuzamahanga mu gihembwe cya kane cy'umwaka wa 2021.

Komite ya Politiki y'Ifaranga izakomeza gukurikiranira hafi uko ubukungu bwifashe, kandi yiteguye gufata izindi ngamba zaba ngombwa mu gushyigikira ubukungu no gukumira ihindagurika rikabije ry'ibiciro ku isoko.

Ku wa 11 Ugushyingo 2021

